

陶雲汀先生奏疏

奏摺卷十三目錄

撫蘇稿

安化陶

敬陳海運圖說摺子

附海運圖

海運米船開放大洋併續兌情形摺子

江督漕督會稿

附片
二件

海船初運兌竣仍飭接續趕辦及暫行回省辦

事摺子

附片二件

嚴懲刀械匪徒摺子

附片一件

籌覆海運應解直隸需用銀兩摺子

江督漕督會稿

海船在洋遇風平穩併接辦次運米石摺子

附片

件一

動撥貧民口糧銀款摺子

總督會稿

會議潯關查稅事宜摺子

織造會稿

審擬京控勾學舞弊摺子

請將舊欠漕尾展限摺子

請將積年緩帶漕米留備民食摺子

總督會稿
附片一件

敬陳海運圖說摺子 附海運圖

奏爲敬陳海運圖說仰祈

聖鑒事竊照蘇松常鎮太五府州額漕因運河阻滯
改由上海沙船運赴天津現已辦有成局依次
開行 臣伏思海運與河道原相表裏禹貢載揚
州貢賦沿海達淮冀州夾右碣石入海卽海運
之始秦唐雖亦偶行其道難稽明則由膠萊內
河轉搬登州實爲勞費惟元代海運最久然至
元十九年初次運米僅止四萬三千石明年始
抵直沽行之六七年猶歲祇運米三四十萬不

等旋因其路險惡另開生道運米漸多蓋海船畏淺不畏深畏礁不畏風而畏淺尤甚於礁明人沿嶼求道非礁卽淺無怪其難自不若元代所開生道卽今沙船所行爲最善查元明入海之道或由劉河轉膠角沙或由灌河口至鷹游門今俱壅塞惟吳淞口至十潏一路爲宜而由此運米入海實艱自今年臣因初次試行卽須裝米一百五六十萬倍蓰從前不敢不倍加慎重每遇熟習海洋之人詳加詢問證以紀載得其徑道至於大洋浩瀚本無畔岸雖舟人定之

以更香驗之以水色格之以針盤究難確指其道里數目惟有就西岸對出之州縣汎地比照核計不相逕庭其小島微嶼亦難盡載謹摘叙大凡略分段落併繪圖貼說恭呈

御覽

第一段海船自上海縣黃浦口岸東行五十里出吳淞口入洋繞行寶山縣之復寶沙迤至崇明縣之新開河計一百一十里又七十里至十潏是爲內洋十潏可泊船爲候風放洋之所崇明縣地

第二段自十激開行卽屬外洋東迤一百八十里至奈山一名蛇山又名南槎山係荒礁上無居民不可泊但能寄碇爲東出大洋之標準蘇松鎮所轄

第三段自奈山駛入大洋向正北微偏東行至通州呂泗場對出之洋面約二百餘里水深十丈可寄碇從此以北入黑水大洋至大洋梢對出之洋面約一百四十餘里係狼山鎮右營所轄又北如臯縣對出之洋面起至黃沙洋港對出之洋面約二百六十餘里又北

泰州對出之洋面起至黃家港對出之洋面約二百二十里係狼山鎮掘港營所轄又北至鬬龍港對出之洋面約二百里又北至射陽湖對出之洋面約一百二十里係鹽城營所轄又北至黃河口對出之洋面約一百二十里係廟灣營所轄黃河口稍南有沙埂五條船行遇東風則慮淺擱宜避之又北至安東縣灌河口對出之洋面約九十里係佃湖營所轄又北至海州贛榆縣鷹游門對出之洋面約一百八十里係東海營所轄計自余

山大洋以北起至鷹遊門對出之洋面止約計一千五六百里統歸狼山鎮汛地凡舟行過佘山卽四顧汪洋無島嶼可依行船用羅盤格定方向轉針向北略東行如東南風則針頭偏東一箇字如西南風則針用子午查江南佘山與山東鐵槎山南北遙對謂之南槎北槎行船應用子午正針因江境雲梯關迤東有大沙一道自西向東接漲甚遠暗伏海中恐東風過旺船行落西是以針頭必須偏東一箇字避過暗沙再換正針此沙徑東

北積爲沙埂舟人呼爲沙頭山若船行過於偏東一直上北便見高麗諸山故將至大沙時仍須偏西始能對成山一帶也

第四段行過鷹遊門對出之洋面往北卽山東日照縣界山東水師南洋汛所轄又北至文登縣之鐵槎山一名北槎山自柰山至此始見島嶼又北至文登縣之馬頭嘴入東洋汛界經由蘇山島靖海衛及榮成縣之石島養魚池石島居民稠密可泊惟島門東南向春時乘風易入難出自鷹游門至石島約六百

餘里大洋中雖舵工以針盤定方向猶須常用水托水托者以鉛爲墜用繩繫之探水取則也每五尺爲一托查十激開船試水自十托至二十托上下行過奈山試水均在三十托上下順風二日餘均係黑水再試至十托上下卽知船到大沙洋面行過大沙試水漸深至五十托上下視水綠色則係山東洋面順風再一日試水二十托上下水仍綠色遙望北槎及石島一帶山頭隱隱可見再行半日卽至石島洋面此商船赴北一定針路也

第五段自石島至俚島洋面約一百六十里俚島至成山洋面約一百四十里俱榮成縣地爲南北扼要之所可泊水綠色針盤仍用子午略偏東從成山轉頭改針向西略北入北洋汎界至文登縣之劉公島約一百餘里又西至威海衛一百餘里又西至福山縣之之罘島一百餘里又北至蓬萊縣廟島二百餘里以上自石島起至廟島止約共九百餘里之罘島西北一帶有暗礁船行偏東以避之又廟島之東有長山頭淺灘宜避試水在十

五六托至二十托不等船至廟島以東南風
爲大順計東省洋面共一百零五島中有二
十五島最爲海道要地而廟島尤大可以停
泊

第六段自廟島過掖縣小石島卽入直隸天津
海口約九百里針對大西偏北沿途試水在
十四五托再試水至六托上下水黃色水底
軟泥卽可拋錨候潮進口約計天津海口逆
流挽繚一百八十里卽抵天津東關外

以上海運水程自吳淞口出十欸東向大洋至

奈山北向鐵槎山歷成山西轉之罘島稍北抵天津總計水程四千餘里伏查我

朝自康熙年間開海禁以來商舶往還關東天津等處習以爲常凡駕駛之技趨向之方靡不漸推漸準愈久愈精是海運雖屬試行海船實所習慣而春夏之時東南風多行走尤爲順利臣謹就見聞所及臚陳大概伏祈

皇上聖鑒謹

奏

道光六年二月初三日上海由驛具

奏二月二十一日奉到

硃批所奏均悉圖留覽欽此


海運圖

西

北

東

附雪水之入海之圖



海河水程係從上海至
 寧山出吳淞口由崇明
 十灣出外洋正東過余
 山向北偏東行過大沙
 灣正北趨成山又轉西
 偏北至南長連入津共
 計行面四千餘里

城皇廟
 河海大江綠鴨
 門連良高





海陽縣

黃南

集

黃

黃

黃

黃

黃

黃

黃

黃

黃

鐵橋一名北橋與江
南金山連對謂之南
橋北橋自金山至此
約二千里始見得月

黑水大洋

大沙古云萬里長沙自西至東橫至甚
長南北約寬五十里水深九丈行至沙
南對開偏東過此五十里至沙北水深
二十丈對開正北又行二百里水深二
十餘丈係黑水洋面宜向三面風


五條沙 五條沙易于汽開
為行通東風宜防

大沙東有伊頭山如
舟行未東見此山則
在北也見高層諸山
又須備西方對成山

沙頭山



余山至吕泗外洋宜
遇南三面風水深十
丈可寄棹



海運米船開放大洋并續兌情形摺子

江督漕督會稿

附片
二件

奏爲恭報運米海船開放大洋並續兌各情形仰
祈

聖鑒事竊照海運初兌米船前因陸續放出吳淞口

至十漉地方寄碇候風開行經

臣

等先後具

奏在案查十漉地方雖隸崇明縣境已在內洋之
外緊接黑水大洋一過佗山卽無島嶼可依必
得順風三四日始抵山東之石島成山一帶中
間洋面將近二千里並無拋錨寄碇之處是以

船行必須看定風色始能向北駛行非比內河
可以刻期催趲前經詢據開行各船僉稱候過
二月初八日風信之期方能放洋業經臣陶澍
於前摺內聲明在案茲自二月初八日以後風
雨稍稀該處十潞離上海地方沙渚回環程途
已遠當卽專委往探據稱自二月初十日風轉
東南比卽有船百餘隻起旋放洋前進隨後跟
到各船亦在該處寄旋陸續開放等情查旬日
以來風雨連綿不特海船難以行駛卽各屬剥
米船隻亦因漕糧重大未敢冒雨催兌幸自十

三日風氣晴霽每日斛兌仍可四五萬石不等
統計已開未開各船現共斛兌正耗漕白等米
八十五萬餘石共兌船八百餘隻鎮江一府之
米業已全行兌開蘇松常太四屬漕糧亦兌十
之六七其各處未到剝船現在春水方生足資
浮送不致如前繞道可期迅速所有米船自十
滋放洋及現辦兌開各情形臣等因海運事重
謹會同總漕臣陳中孚合詞繕摺由驛馳
奏仰慰

宸厪伏乞

皇上聖鑒謹

奏

道光六年二月十五日上海由驛具

奏三月初二日奉到

硃批知道了欽此

再漕米經由大海應由水師營汛帶兵防護迭

經

臣

琦善督飭各營遵照辦理茲提

臣

王應鳳

鎮

臣

曹興邦副將

臣

裘安邦先後巡洋前來上

海與

臣

陶澍會晤復經嚴飭各弁兵乘船樹幟

攜帶鎗礮吹螺傳送夜間懸掛桅燈支更瞭望

梭織巡查俾資防範其糧船由上海至吳淞口

係屬內河卽令署守備劉均帶領兵船護送由

吳淞口至十潑係屬內洋卽令署參將田松林

接送自十潑至佘山以北之外洋卽令狼右營

遊擊徐天柱接送自大洋梢至黃家港對出之

大洋卽令遊擊徐天柱帶同掘港營把總程淮
接送自黃家港至射陽湖對出之大洋卽令鹽
城營遊擊趙本接送自射陽湖至黃河口對出
之大洋卽令廟灣營遊擊沈清瑞接送自黃河
口至灌河口對出之大洋卽令佃湖營都司保
常泰接送自灌河口至鷹遊門對出之大洋卽
令東海營都司孫廷揚接送至山東日照縣界
交替均酌帶兵船逐層防護勿使疏虞其鹽城
廟灣佃湖東海等營雖係狼山鎮所轄究隸沁
河兩標已一體咨照轉飭照辦至奈山迤南如

陳錢馬蹟等山雖係浙江交界實爲江省門戶
又內洋之練祈深淘及施翹河六滋十滋等處
均關要害另派蘇松中營遊擊陳松林暨都司
楊朝棟守備周維藩陳之奎周世揚鮑起豹等
往來巡查以重巡防而昭整肅合併附片以

聞謹

奏

三月初二日奉到

硃批知道了欽此

再米船一出大洋各自駛行並無幫次全視耆
舵爲用非如糧艘有運弁照料惟泊船寄旋之
所仍須派員彈壓方昭整飭前經臣等

奏明初運船隻遴委川沙營叅將關天培督押茲
查初運米船較多未便遲俟兌竣已飭關天培
督押現兌各船前赴天津至將來初運全竣時
仍須委員護押已據提臣另派都司俞大銓屆
期押送石島交替合併附陳謹

奏

三月初二日奉到

殊批知道了欽此

海船初運兌竣仍飭接續趕辦及暫行回省辦

事摺子

附片二件

奏爲海船初運兌竣仍接續趕辦暨

微臣

暫回省

城各緣由仰祈

聖鑒事竊照海運糧米以多爲貴原不拘定兩運之
限而船隻有數不能同時並集自應酌分先後
以期剝運兌裝均無歧悞前經札商督臣將一
應事宜預爲籌酌意見相同卽經臣親赴上海
提齊已到各船均勻裝配業將開行出洋各情
形會同臣琦善具

奏在案旬日以來天氣晴和風色亦順復經督飭該道府等催集各委員將現已扞量各船趕緊斛兌截至二月二十一日止總共兌過正耗米一百一十二萬二千餘石所有已扞各船俱經兌竣該船戶等踴躍趨公連日尙有自北回南零星入口卸貨及修艙未完尙須勾抵灰縫之船均可陸續裝載臣已飭印委各員仍當隨驗隨扞一體兌運隨時開放不許稍形疏懈惟本年海運米石除正耗漕白等米一百五十餘萬外尙有給船耗米十數萬不在正運之內亦須

載運以備折耗通計米數實有一百六十三萬三千餘石米質本重爲數又多就現在已到未到及應須修艙各船猶不敷裝載不能不分爲兩次運送而一過春夏之交南風司令北船回滬較難

天庾重大不敢不及早圖維惟冀前船回棹迅速俾二運得資趕辦臣自駐上海業經匝月初運糧米已逾全漕三分之二嗣後照常交兌可期無悞臣於拜摺後卽暫行回省辦理衙門緊要事件仍飭該道等督同委員妥爲經理陸續申

報所有初運漕糧兌竣並接續趕辦各緣由謹
會同兩江總督臣琦善漕運總督臣陳中孚合
詞繕摺由驛具

奏仰荅

宸廑伏祈

皇上聖鑒謹

奏

道光六年二月二十二日由驛具

奏三月十二日奉到

硃批另有旨欽此同日並准

軍機處知會海船初運兌竣及收買沙船餘米
摺片各一件已奉有寄信

諭旨交尙書穆彰阿直督那彥成倉場侍郎申啟賢
並

盛京將軍晉昌等照辦至耗米變價並交穆彰阿
等查照天津時價收買矣 三月初三日

再蘇松常鎮太四府一州每年起運漕糧例給旗丁耗米一十八萬餘石原以備途中折耗之需前因海運較速無須與漕船一例全給當經臣等議

奏除省出耗米六萬餘石卽隨正運赴津以爲到通剝船飯食等用外所有載米沙船每裝運白糧一石仍酌給船戶耗米一斗裝運糙米一石仍酌給耗米八升以備折耗之用查現在各州縣起運漕糧斛兌足數各沙船順風赴津卽有折耗爲數無多此項給船耗米將來兌交額糧

之後應有餘剩合計不下十萬餘石在該船等業已到津交卸所得餘米自須就地變價易貨臣思沙船赴津總以迅速回南趕裝二運爲務若餘米投行變糶展轉議價收銀難免耽延時日自不若查照收買糧船餘米之例於沙船到津兌交額糧後將此項餘剩耗米就近官爲收買在各沙船得價易貨回檣可期迅速而漕糧正額之外又可增米十萬之多於倉儲運船均有裨益惟收買糧船餘米例價向有一定今沙船應得耗米如交兌正額並無短少原聽其自

行食用變糶而沙船與糧船軍商各別較收買糧船餘米之例稍有不同似應按照時價酌給以示體卹如蒙

俞允應請

敕下戶部並直隸總督會同倉場衙門一面查照天津米價出示曉諭如沙船到津有願將耗米變價者卽照市價就地給銀收買俾期迅速臣爲利漕起見謹會同督臣合詞附驛具

奏伏乞

訓示遵行謹

奏

道光六年二月二十二日附

奏三月十二日奉到

硃批只可聽其自便難於勒令另有旨欽此

旋准天津收米大臣咨抄道光六年三月初三日奉

上諭陶澍奏海船初運兌竣仍接續趕辦一摺本年初次試行海運據該撫奏截至二月二十一日止共兌過正耗米一百一十二萬二千餘石事機極為順利惟海運米石除正耗漕白等米尚有給船

耗米通計米數有一百六十三萬三千餘石各船
不敷裝載不能不分兩次運送一過春夏之交南
風司令北船回滬較難自應令初運沙船迅速回
棹俾二運得資趕辦本日據天津鎮總兵克什德
奏報長洲縣第十三號船一隻於二十九日早潮
引進天津海口日內諒已陸續前來穆彰阿等接
奉此旨卽飭該鎮道等遇有海運抵津隨到隨剝
不准片刻延滯並嚴飭坐糧廳稽查吏胥經紀人
等如有刁難需索立即重懲毋稍姑息總令沙船
卸米前往奉天買豆迅速回南以便趕辦二運又

陶澍另片奏給船耗米將兌交額糧後應有餘剩
合計不下十萬餘石請查照糧船餘米之例就近
官爲收買等語向來南糧餘米俱准在通變賣惟
例價向有一定沙船糧船軍商各別若官爲收買
轉啟勒指諸弊自應聽其自便著穆彰阿等查照
天津時價出示曉諭如有願將耗米變價者卽聽
該處民人照市價收買該商旣可藉以沾潤於該
處市價民食亦有裨益將此各諭令知之欽此
旋又據協辦大學士英和奏海運沙船到津餘
米仍應官爲收買一摺道光六年三月十九日

奉

旨海運現已陸續到津沙船餘米不下十萬餘石前經降旨照南糧餘米例聽天津民人照市價收買茲據英和奏沙船宜令速歸趕運二次米石恐該商等希圖賤價售買觀望不前請由部動用銀二十萬兩官爲收買著順天府卽派委妥員赴部領銀分起解往天津暫存道庫併著穆彰阿等於正米收竣後卽傳諭江南委員如有船戶願賣餘米聽該處民人照市價收買倘該處不能銷售卽動項照市價官爲收買其價銀由江南委員轉發船

戶毋得假手吏胥致啟勒指短發諸弊俾沙船得
以早歸毋誤二次接運欽此

再海運各船前於初十日開放大洋百餘隻茲
又接副將裴安邦稟稱十七日午刻風轉東南
有船一百五六十號自十汲起旋酉刻全抵奈
山赴北駛放大洋又十八日午刻有船一百七
十餘號亦於酉刻駛出奈山大洋十九日仍有
赴汲寄旋之船一百九十餘號現在風色正順
計可陸續暢行足慰

宸廑謹附片具

奏

道光六年二月二十二日附

奏三月十二日奉到

硃批欣慰覽之欽此

嚴懲刀械匪徒摺子

附片一件

奏爲查辦刀械匪徒請嚴懲其始以資整飭仰祈
聖鑒事竊照江蘇省徐邳淮海一帶與皖豫山東等
處犬牙相錯匪徒惡棍出沒其間兼之民俗強
悍以佩刀執械爲能事傷人釀命之案倍於他
屬屢經臣督飭訪拏拘獲匪犯多名並起獲兇
器等件迭次附片

奏明懲辦在案惟查此等匪棍其始亦不過尋常
游手任性而行漫無拘束漸至三五聯絡藉端
嚇詐稍有睚眦卽拔刀相向庸懦畏勢不敢與

較以致益鳴得意愈肆橫行久之遂成拽刀渠
惡騷擾棍徒兇搶仇殺爲害遂烈雖屢加創艾
總未能杜絕根株良由習與性成其來已非一
日查定例拽刀匪徒在於場市結夥搶奪原有
斬絞之條棍徒生事行兇亦有遣戍之例一經
犯案不難按例加重辦理而此等佩執兇器偶
然挾詐逞兇平日又無犯法實跡按照本例僅
止枷杖旣不敢稍存周內強相比附而責釋之
後故智頓萌轉以輕於嘗試長其犯法之心實
屬大爲民害

臣

思刑戮施於小人與其治之於

已成而窮搜遠捕誅不勝誅自不若防之於未然而小懲大誡辟以止辟伏查嘉慶十六七年間四川廣東兩省因綰匪及無藉棍徒攜帶刀械行竊嚇詐奏請鎖繫鐵桿欽奉

諭旨允行厥後匪徒稍知斂戢今江蘇省徐淮海三屬匪徒與四川廣東情形相類應請仿照該省成案除常用小刀不在例禁外如有佩帶兇器刀械之挾詐棍徒一經拏獲每名鎖繫鐵桿一枝以四十斤爲度定限一年果能改悔自新卽予釋放若不悛改再繫一年倘仍始終怙惡卽按

其情節照棍徒屢次擾害行兇之例分別從嚴
究辦庶幾消其桀驁力挽頽風於懲創中卽寓
振興之意再江蘇省接近如山東之兗沂曹三
府河南之汝陳光等府州安徽之潁鳳泗三屬
一民情勁悍地界相連可否一體仿照辦理於壤
錯相連之處緝捕更爲有益臣爲戢暴安良起
見謹會同兩江總督臣琦善恭摺具

奏伏乞

皇上聖鑒訓示遵行謹

奏

道光六年二月二十九日具

奏四月初三日奉到

硃批另有旨欽此又道光六年三月十七日內閣奉
上諭陶澍奏請嚴懲刀械匪徒一摺江蘇省徐邳淮
海一帶與皖豫山東境壤毗連匪徒出沒每以佩
刀持械爲能始則三五成羣藉端嚇詐繼則肆意
橫行兇搶伏殺最爲地方之害茲據該撫以此等
佩執兇器匪徒偶然挾詐逞兇平日又無犯法實
跡按照本例僅止枷杖旣未便照拽刀匪徒結夥
搶奪及棍徒生事行兇之例強相比附而責釋之

後故智頓萌轉以輕於嘗試長其犯法之心援照四川廣東懲辦綰匪棍徒之例鎖繫鐵杆以期小懲大誡着照所請嗣後江蘇徐淮海三屬匪徒如有佩帶兇器刀械挾詐逞兇者一經拏獲每名鎖繫鐵杆一枝重四十斤爲度定限一年果能改悔自新卽予釋放若不悛改再繫一年倘仍始終怙惡卽按其情節照棍徒屢次擾害行兇例分別從嚴究辦其接近江蘇之山東兗沂曹三府河南汝陳光等府州安徽潁鳳泗三屬民情强悍地界相連並着一體仿照辦理以挽頽風而安良善該部

知道欽此

再徐海等屬向爲匪棍出沒之所經臣飭屬嚴拏先後據獲梟徒兇盜共三百餘名分起審辦奏蒙

聖鑒在案誠恐宵小潛入復嚴飭巡緝茲據徐州府張作楠轉據邳州李正鼎稟報獲有匪犯蕭玉明等十餘名查起兇器十餘件又據海州營叅將王慶元稟報會同該州劉鈴等獲有匪犯祁三等十餘名查起長槍一桿壯刀三把訊稱或係販私行竊或在山東鄒城縣開場聚賭剽劫私鹽逃逸並據署海州營叅將吉祥保稟報會

同該州劉鈴巡獲賊匪費小虎等十餘名按獲壯刀一口均認爲匪不諱又據該叅將吉祥保稟報拏獲鹽犯王三盛于春等十餘名海州營錢家集都司周祐先後稟報拏獲鹽犯鄒蘭王懷禮等十餘名均起有車輛鹽斤又據護京口水師副將事署鎮江營叅將秦攀萼稟報督飭瓜洲營守備李長貴等拏獲梟匪曹華拒傷線目併獲匪犯萬景興等起有刀秤等物又據該叅將秦攀萼稟報署高資營都司吳加寶督率弁兵拏獲倂梟周得勝等共計拏獲匪徒鹽犯

七十餘名共獲私鹽數萬餘斤各等情臣查刀槍兇器有干例禁現在人械並獲亟須究治且恐各犯另有不法別案尤應嚴切根究俾無遁情當經批行分別確審據實懲辦臣仍飭各屬實力查拏期於有犯必獲以靖地方合將續獲各匪辦理緣由附片以

聞謹

奏

道光六年二月二十九日附

奏四月初三日奉到

殊批所辦甚好欽此

籌覆海運應解直隸需用銀兩摺子

江督漕督會稿

奏爲籌覆海運應解直隸需用銀兩查款動解恭摺奏

聞事竊照蘇松等屬漕糧試行海運迭准戶部咨行天津需用剝船價值等項以起運米一百六七十萬石照洪斛折算約該銀一十七萬餘兩並北倉截卸需用露囤搭蓋棚廠兵役飯食雇用緯夫等項應於水腳項下支銀三萬兩又倉場衙門應需經紀個兒錢飯米津貼等款銀七萬餘兩請先由通濟天津運道各庫暫墊仍由兩

江總督如數籌解歸款至官剝船隻油艙一項
俟漕竣核明銀數由坐糧廳移咨蘇省在漕贈
等項銀內提扣解交還款等因臣等伏查蘇省
起運漕白正耗米一百五十一萬餘石照洪斛
折算應解天津剝價等項銀一十五萬二千餘
兩北倉截卸露囤等項銀一萬兩又倉場需用
銀七萬五千餘兩二共銀二十五萬七千餘兩
除前已由蘇籌款解過銀十二萬餘兩又應照
部議在於隨漕徵收水腳項下撥解銀三萬兩
外約計尙應籌解銀十萬餘兩查倉場所議經

紀津貼內有與直隸重複之款而天津剝船雇
價一項又有官剝民剝之分此時均難截數撥
解惟現在商船將次到津卽須動用自應先行
籌款酌量解往以應急需當經轉飭江蘇藩司
賀長齡臬司覺羅慶善江安糧道湯藩蘇松糧
道宋潢蘇松太道潘恭常會議分別籌解去後
茲據該司道詳稱海運一切經費皆屬在外籌
備並未開銷

帑項前已措解過天津通倉兩處銀一十二萬餘
兩現在本省支給商船水腳神福犒賞以及各

州縣雇用剝船製備席篾等款爲費不貲兼有
次運之米待用尙多以所備之銀核應用之數
或可撙節濟公實不便儘數解往天津轉致本
省支用不敷辦理掣肘惟查本年海運比較河
運之年有節省漕項銀米現存蘇松糧道庫給
丁行贈等銀二十餘萬兩堪以動用所有現議
補解各款銀兩向係旗丁在於得項內自行措
交卽出於漕項銀米之中則直省需用還墊各
款應卽在節省漕項銀款內酌量動撥此外尙
有隨運赴津節省餘耗漕白米五萬九千餘石

係

奏明酌量撥抵折耗飯米之用除現由倉場撥給
經紀耗米一萬九千餘石外尙剩耗米四萬餘
石亦係海運餘出之米應卽作正交倉合併聲
明等語詳請

奏明撥解前來臣等覆加核計所詳係屬實在情
形目下商船自必陸續抵津待用不能稍緩臣
等謹卽恭摺奏

聞一面在於節省漕項內動支銀七萬兩同撥解水
腳銀三萬兩迅速逕解天津道庫相應請

旨敕下戶部轉行直省按款分支以應急需所有節省餘耗米四萬餘石仍卽作正交倉至江蘇漕項銀米將來實可節省若干統俟全漕完竣再行計數另請報撥所有_臣等籌款補解緣由謹會同總漕_臣陳中孚合詞繕摺具

奏伏乞

皇上聖鑒謹

奏

道光六年二月二十九日具

奏四月初三日奉到

硃批戶部知道欽此

海船在洋遇風平穩併接辦次運米石摺子

附片

一件

奏爲海運船隻在洋猝遇暴風行走平穩並續運米石接連辦理情形仰祈

聖鑒事竊照海運漕糧前經

臣

親赴上海督集各船

踴躍受兌於應給舵水犒賞之外分別賞給銀牌以示獎勸一面諄諭以事關

天庾倍須保重該耆舵等均皆歡欣聽受

臣

因初

運糧米已逾全漕三分之二此後接續交兌可期無悞業於二月二十五日暫回省城辦事旋

於二十六七兩晝夜西北暴風大作兼落黃沙
臣恐放洋各船有失卽經飭委員弁就江省沿
海一帶查看尙無失事之船惟往北黑水大洋
尤關緊要正差探間接據押運委員川沙營叅
將關天培稟稱督押米船自佘山起碇至二月
二十三日船過大沙洋面是日霧重風輕止能
東西折戩未能前駛二十五日已刻入山東境
黑水大洋二十六日丑刻約離石島相近因風
雨夜黑不見山頭忽轉西北暴風各船均下太
平筐籃隨風漂漾直至二十八日風浪稍和起

籃開篷向西折戢二十九日酉刻至石島北寄
碇三月初一日南風大霧至未刻收泊俚島是
晚又起北風大暴至初二夜風定查俚島口內
停泊米船一百五隻又收口船十一隻係已過
成山被風折回比卽會同文登協副將逐船查
詢崇明縣船戶蔣朱順一船裝運無錫縣漕米
八百二十石於二十六日在洋遇風打傷船梢
冲斷跳停樑板併冲裂後橫板進水只得鬆艙
拋去漕米七十餘石又贛榆縣船戶吳裕隆太
倉州船戶葛恒順二船亦於二十六日在洋遇

風因浪勢湧激船面過水潮濕糧米旋同該處
文武會驗葛恒順一船係裝運陽湖縣白糧止
濕浮面一層米三四十石又吳裕隆一船係裝
運常熟縣漕糧止濕浮面一層米三十餘石當
令舵水人等先將受潮米石趕緊曬晾分艙另
貯至蔣朱順一船所損船梢樑板各件已飭覓
匠趕緊修理大約三四日即可修竣開行現在
米船行過俚島者約計五百號內外一俟風轉
東南卽赴廟島一帶稽查所有江省及山東沿
海巡船聲勢尙屬連接等情具稟前來臣查二

月二十六七等日風沙暴起洶浪異常在洋米船人力難施仰賴

聖主洪福得以化險爲平幸無一船失事僅止蔣朱順等三船微有損濕業經該叅將查驗蔣朱順一船拋散米七十餘石實因風猛鬆艙並無捏飾盜賣情弊應請查照章程俟到津之日將給船耗米抵補不致多有短缺至葛恒順吳裕隆兩船受潮米石並經該叅將飭令逐一曬晾另給貯運亦應俟抵津之日由

欽派大臣查驗有無蒸變查照章程核辦至海洋船

隻順風駛行亦時折戢行走儘有同日開行而
到岸之期相去逾旬卽上年已具承攬之船至
今尙有五十餘隻未歸約計到時卸貨修艤陸
續兌開其時初運之船亦必有回棹而南者牽
前搭後絡繹放行卽可無須截分兩運以歸妥
速所有海船在洋遇風據報尙無失事暨續兌
糧米各情形謹會同督臣琦善漕臣陳中孚合
詞恭摺具

奏伏乞

皇上聖鑒謹

奏

道光六年三月二十日具

奏四月二十日奉到

硃批所奏俱悉欽此

再海運前次裝米一百一十二萬餘石陸續接辦各船先後出口放洋情形業經

奏蒙

聖鑒在案茲復據委員李景嶧等稟報截至三月十五日止續又兌過米十一萬餘石連前共兌正耗米一百二十三萬四千九百餘石所有續兌各船絡繹出口並據崇明縣知縣王青蓮縣丞畢以紱等前後稟稱自二月二十一二等日東南風順有船二百四十餘號自十潞開放外洋二十四日又有放洋米船三十餘號二十

五六七八等日風狂浪大沙霧迷漫當經督率
兵役梭織巡諭寄旋各船多下錨纜加意護持
俱皆平穩二十九日天氣晴朗風轉東南有船
五十餘號開放大洋又自三月初一日起至初
五日有船二百四十餘隻陸續放洋初七八九
十等日風發東南又間放米船一百餘號惟自
吳淞口至十漊地方經過復寶銅沙等處海船
畏淺多泊中洪一遇順風揚帆逕過難以截數
點驗約計放洋船隻現在已有一千餘號尙有
赴漊寄旋之船守風未開並據副將裘安邦稟

稱於巡護之際見有自北回南沙船詢據該船
耆舵口稱一路遇見赴北糧船俱各順利等語
查連日風色和順各船計可揚帆北上陸續抵
津足慰

聖厯合併附片以

聞謹

奏

道光六年三月二十日具

奏四月二十日奉到

硃批知道了欽此

會議許關查稅事宜摺子

織造
會稿

奏爲遵

旨會議許關查稅事宜恭摺覆

奏仰祈

聖鑒事案查前奉

上諭上年據延隆奏許墅關南北商船每多偷漏出海以致內河各關稅課不能足額當令孫玉庭等嚴禁偷漏本年復據御史熊遇泰奏江蘇織造衙門胥吏私雇巡船藉端訛索遇有重載商船逼令內河行走當降旨令該督撫等詳加確訪所有販

往北省茶船及不在出洋例禁商販貨船於出口時驗明照例納稅放行茲復據延隆奏請量爲變通凡客商製販南雜布疋茶葉紙張等物前赴上海出口者除實在行銷關東登萊青等處字號婁齊門掛號舊冊有名者仍照舊免稅驗放外其舊冊無名本係影射關東等處者免其截留惟令於雇船裝運之時將各貨赴關報明按津關則例完納錢糧卽由婁齊門簽驗給串放行聽其繞走海關給照出口其豫東所產黃豆並海州青口所產豆餅等物及江廣桐油藥材煙葉等北貨南銷皆

計關應徵之稅如有越漏照舊於太倉瀏河一帶查拏將該商押赴計關補稅其浙閩土產在蘇銷售並由蘇城販往浙閩南裝南卸計關例不收稅等語延隆所奏自係爲關課足額起見惟設關收稅所以裕國通商國課固宜充盈而商販亦不可紊亂著陶澍會同該織造查照所奏各條秉公妥議是否可行據實奏聞再降諭旨該撫等雖各有職守總期彼此兩有裨益勿得稍存私見將此諭知陶澍並傳諭延隆知之欽此當經遵

旨傳諭織造

臣

延隆欽遵知照

臣

陶澍因甫蒞江蘇

是否可行尚須細加體察方可會議先經附片
奏奉

硃批悉心妥議毋爲屬員所惑欽此茲臣數月以來
細加察訪復與臣延隆公同商酌伏查定例凡
江北江廣等處貨船赴蘇杭者均進京口歸滬
墅關報稅福建浙江關東錦州山東登萊等處
貨船及本省通州土物由海對渡者均進劉河
上海等口歸江海關報稅倘有將應赴滬墅關
貨物繞道由海關納稅者查出治罪等語又嘉
慶二十二年欽奉

上諭商船出海販運所帶貨物應准出洋與不准出洋者本有定例著通諭海關省分各督撫嚴飭管理關稅之員於商船到口時驗其所帶貨物除例准出洋者令其納課放行如例不准出洋貨物一槩截留不許出口等因欽此欽遵各在案是商船販運往來不論新舊字號其貨地均有一定勿容紊越

聖諭昭垂實爲沿海各關恪守不易之則惟查乾隆年間題定江海關稅則本輕於許墅關又復七折對折徵收格外體卹商情本所易就兼以頻年河道阻滯百貨難通其勢更不能不出於海雖

字號有新舊其前赴關東登萊等處則同一給
照不在例禁出洋之列但就目下滸關稅課短
絀情形而論未必不因乎此自宜設法調劑應
請凡客商自蘇製販南雜布茶等貨前赴上海
出口者除自道光五年以前由婁齊門掛號舊
冊有名者滸關毋庸納稅外其現在新立字號
向未從婁齊門掛號者均請照 臣 延隆原奏於
滸墅關暫行兼納錢糧由婁齊門驗放前赴江
海關輸稅出口一俟禦黃壩開放河路通順貨
船暢行仍照舊分別貨地行走毋庸兼納錢糧

至行銷浙閩等省南裝南卸之貨經由婁齊門
巡口向不掛驗收稅應循其舊其安徽徽州等
屬並浙閩貨船之經由嘉善松江等處前赴海
關出口者既非蘇貨繞越本不經由婁齊門均
毋庸掛號納稅再臣延隆前請於太倉劉河密
派巡船查拏偷漏一節臣等復加酌議以江廣
桐油藥材煙葉等項北貨南銷既有上游三江
營等處巡船查察已屬周密太倉劉河係在下
游海關地段亦可毋庸添派巡船以免紛更臣
等近在同城於關務稅課有相助爲理之責惟

有隨時會同查察嚴禁奸商猾埠勾串滋弊有
犯必懲決不姑息倘胥役人等藉端訛詐亦必
從實懲治以裕

國課而安商旅斷不敢稍存畛域上負

聖慈所有臣等會議詳聖關查稅事宜謹合詞恭摺
覆

奏伏乞

皇上聖鑒謹

奏

道光六年三月二十一日具

奏四月二十日奉到

硃批依議認真妥辦欽此

動撥貧民口糧銀款摺子

總督會稿

奏爲動撥

恩賞貧民口糧銀款恭摺

奏祈

聖鑒事竊臣等接准部咨道光六年正月初四日奉
上諭上年江蘇省沛縣被災業經降旨蠲緩小民自
可無虞困乏惟念今春青黃不接之時民力仍恐
竭蹶著加恩將沛縣成災五分之坊一等十二里
乏食貧民賞給一月口糧以資接濟用示朕惠鮮
懷保敷布春膏至意等因欽此仰見

聖主惠愛黎元有加無已之至意當卽轉行藩司欽
遵併刊刷謄黃通行曉諭一面確查實需銀數
請撥去後茲據江寧布政使張志緒詳稱遵卽
飛飭該管之徐州府就近遴委幹員會同印官
挨查戶口造冊詳辦茲據沛縣申稱准各委員
將查實戶口造冊移縣核計實需貧民兵屬口
糧銀一萬五千五百二十七兩零貧生口糧銀
一百五十三兩零等情查司庫正項內漕價及
攤徵河工二款現有存銀所有應給貧民兵屬
口糧銀一萬五千五百餘兩請卽於漕價款內

動撥銀一萬兩攤徵河工款內動撥銀五千五百二十七兩零其貧生口糧銀一百五十三兩零照例請於存公款內支用事竣核實造報請銷詳請

奏明撥用前來臣等覆加察核據請動撥銀兩係照例核計在所必需相應恭懇

天恩俯准按數動撥以資接濟事竣核實造報如有餘剩報部撥用除飭該管道府督飭印委各員核實散放務期實惠均沾仍隨時嚴密察訪如有胥役尅扣胥濫情弊立即據實嚴叅究辦所

有勅撥口糧銀款緣由謹合詞恭摺具

奏伏乞

皇上聖鑒謹

奏

道光六年三月二十日具

奏四月二十日奉到

硃批另有旨欽此同日奉道光六年四月初三日內
閣奉

上諭琦善等奏勸撥貧民口糧銀兩一摺江蘇省沛
縣上年成災五分之坊一等十二里乏食貧民前

經降旨賞給一月口糧自應照例撥給據該督等
查明貧民兵屬口糧需銀一萬五千五百二十七
兩零著准其在司庫正項內漕價及灘徵河工三
款存銀按數動撥以資接濟其貧生口糧銀一百
五十三兩零例動存公銀款著一併給發事竣分
別報銷所有各項存款如有餘剩報部撥用該督
等務須飭屬核實散放俾得實惠均沾仍著隨時
嚴密訪察如有胥役尅扣冒濫等弊卽行據實叅
辦該部知道欽此

審擬京控勾學舞弊摺子

奏爲遵

旨核審定擬並查明遲延緣由恭摺

奏覆仰祈

聖鑒事竊照揚州府學生員張錫嘏以姚澍朦補伊
父張重慶貢缺併生員張春雷勾學舞弊等情
赴部具控經禮部奏明飭查並請定限冊報等
因欽奉

諭旨禮部查奏揚州府學生員張錫嘏呈控姚澍朦
補伊故父歲貢遺缺一案著交江蘇巡撫張師誠

提齊人證卷宗澈底清查秉公核辦原告張錫嘏
交兵部解往備質向例考貢定有限期不准逾限
該省造送歲貢冊籍遲延遺漏致滋弊竇嗣後各
省學政統於每歲考貢後在封印以前造冊送部
如逾期一月不行出咨著禮部將該學政指叅交
部嚴加議處餘著照該部所議行欽此並准部咨
將張錫嘏解蘇當經前撫臣張師誠飭提人卷
解省委員審辦因兩造各執人證不齊案未辦
結經臣查案疊催其時被證郭圭遠幕雲南周
振智久往江西趕傳未到無憑質訊嗣經禮部

奏催奉

旨著陶澍迅將此案訊明定擬具奏並將因何遲延之處一併奏明交部核辦等因欽此茲據江都等縣將郭圭周振智傳案批解飭發長洲縣知縣王錫蒲質審張錫嘏供仍狡展詳由臬司覺羅慶善解勘前來臣隨細核卷據提集兩造詳加研鞫緣張錫嘏係揚州府學文生與文生張春雷係同堂叔姪張錫嘏之父張重慶於乾隆五十一年經前學政臣謝墉考取甘泉縣歲貢已給貢單尙未報部旋於五十二年八月內病故

其胞姪張錫爵卽張春雷之故父赴學呈請將
伊叔張重慶仍准作爲貢生其五十一年歲貢
例應另行考充經該學詳明前學政臣沈初將
翰應陪貢昔存今故之姚澍考准頂補並將歲
考一等一名之附生陳景賢照例挨補姚澍廩
缺其時張錫爵年已十餘旋與張春雷先後入
學迨道光二年二月間張錫爵以伊父從前已
補正貢不應呈請改爲恤貢疑有弊竇向張春
雷斥說其故父張錫爵之非張春雷剖辯致相
爭吵張春雷赴甘泉縣呈控張錫爵卽以張春

雷假冒父名呈改恤貢等情具訴傳訊未結赴
府互控張錫嘏旋因江都縣學廩生許兆鳳考
取嘉慶十九年歲貢尙未報部於二十二年病
故詳經前學政臣湯金釗將陪貢廩生于蔚華
考准頂補並將周振智考補二十三年歲貢其
于蔚華周振智廩缺係附生郭圭劉樹遞補亦
疑係張春雷代謀一併赴府牽告經該府飭縣
移提併訊嗣據已故江都縣教諭范鑑甘泉縣
訓導周鳳翹以貢生張重慶許兆鳳均於未經
報部之前病故姚澍于蔚華等例得頂補並無

朦混情弊詳經前學政臣周系英以張錫嘏不諳定例混控滋累批飭銷案張錫嘏又赴學政衙門呈訴前學政臣以該生執迷瀆控發學戒飭張錫嘏不服卽以歷控各情赴禮部控告奏奉

諭旨交審催提人證來省屢訊據各供悉前情如繪嚴詰張春雷等堅供實無賄囑朦補情事其張重慶病故委係張錫爵呈報並非張春雷托名現有張錫嘏在府原呈可證質之張錫嘏無詞以答亦未能指有弊賄證據惟稱伊父張重慶

係考取乾隆五十一年歲貢並非卹貢何以遲至五十二年病故後始行咨部使姚澍得以頂補卽是弊端等情臣當查學政全書內載考取歲貢已給貢單於未經報部之前本生物故者卽於報冊內聲明達部准作貢生以示矜恤其本年歲貢仍將陪貢頂補等語例內矜卹二字乃矜其死而卹之之意本無卹貢名目卽張錫爵呈報張重慶病故亦請作爲貢生並無改作卹貢字樣確有卷據至陪貢之應否頂補定例總以已未報部爲斷從前學政考貢須俟各屬

送考齊全始行彙咨當張重慶病故時通省歲貢尙未考齊冊報是以照例將陪貢姚澍頂補今張錫嘏於事隔四十年之後人多物故忽以咨報遲延爲詞逞其狡辨無論姚澍本係下年卽應輪充之貢無須謀補伊父遺缺卽就情事而論當日彙咨稍遲亦斷不能預料張重慶之死留爲姚澍補貢地步此尤顯而易見至周振智郭圭劉樹等均年未四十在伊父張重慶身故之後始生其照例考貢補廩均與張重慶渺不相涉更屬案外牽累當向張錫嘏層層詰訊

如有弊竇令其據實指出以憑究辦張錫嘏理
屈詞窮無可置辯是張錫嘏之不諳定例不察
事理混行具控情屬顯然自應據情定案查例
載生員不守學規好訟多事者俱斥革按律發
落等語此案張錫嘏因姚澍頂補伊故父張重
慶貢缺疑有弊竇並不查明例義遽與己故堂
兄張錫爵之子張春雷爭吵併將例應頂補與
本案無干之廩貢于蔚華等牽告己屬不合迨
經學臣以該生執迷竄控發學戒飭又不恪遵
復行赴京越訴實屬好訟多事張錫嘏應革去

文生照不應重律杖八十折責發落張春雷等
訊無勾學舞弊情事應免置議未到人證概免
提質以省拖累再查江蘇前學臣考貢向俟各
屬考齊始行彙案報部歷有年所雖無弊竇究
屬遲延現經禮部議奏欽奉

諭旨定限於每歲封印前冊報業經咨會學臣遵辦
毋庸再議除全案供招咨部查核外合將審擬
緣由恭摺具

奏伏乞

皇上聖鑒訓示再此案前因被證郭圭等遠出原告

張錫嘏狡展無憑質結是以審辦稍稍合併陳
明謹

奏

道光六年三月二十一日具

奏四月二十日奉到

硃批該部議奏欽此

請將舊欠漕尾展限摺子

奏爲查明催追舊欠漕尾尙未徵足實在情形仰懇

聖恩准予展限並請嗣後交代嚴禁漕尾接抵正項以紓民力而杜新虧事竊照州縣經徵漕糧顆粒不容帶欠定例綦嚴祇緣江蘇漕額甲於各省往往刁頑之戶藉訟宕延疲乏小民無力全納以致軍船兌開之際拖欠尙多該牧令恐誤正供不得不動墊庫項買米交幫再向花戶催追還款謂之漕尾其未及歸款以前遇有交卸

卽將未徵漕尾版串私相授受抵作庫項移交
後任接徵歸解是此項墊完漕尾徵解雖歸有
著墊款究屬挪移年復一年實爲辦漕陋習上
年戶部行提存庫銀兩經前撫臣張師誠查明
各屬墊完民欠漕尾實係抵作庫項移交後任
接徵歸補擬請勒限催追

奏蒙

恩旨予限一年責成現任之員追完如屆期再不完
清卽將前後接卸各員嚴叅懲辦其動墊銀款
著落原墊及接徵之員按日分賠等因欽遵在

案臣自調任江蘇卽督同藩司酌定限賠章程
嚴飭各州縣實力催徵查自五年五月初一日
奉

旨起扣至六年四月三十日卽屆一年限滿現已三
月中旬距滿限僅止月餘而據報徵完之數不
過十之三四臣恐各州縣有已徵復挪情事節
經札飭藩司賀長齡蘇松太道潘恭常常鎮道
劉名載確查催提去後旋據蘇松常鎮太五府
州稟稱各屬墊完民欠漕尾一項均已盤查存
串數目相符未完實係民欠惟將次一年限滿

該州縣非不殫力催追乃完數尙屬寥寥推原其故實緣蘇省自三年水災之後民間元氣未復而上年秋稻又爲風霧所傷收成暗減去冬趕辦新漕及帶納積年緩漕米石間閭已形拮据現復併完元二三四等年積欠漕米民情不無苦累是以未能踴躍等語由司道核轉前來臣查錢糧年清年款原不應有墊完漕尾名目旣經前撫臣奏蒙

俞准限年追納已屬格外

天恩逾限未完自應分別著賠惟江蘇省陋習相沿

已久勢難以數年積欠責成於一歲之中兼自
三年分全省被災爲數十年所未有現在徵納
本年錢糧外尙有災緩帶徵各款輸將已屬竭
蹙再加歷年漕尾同時並徵民力實有未逮徒
煩敲撲無補催科旣非所以仰體

聖主惠愛窮黎之至意若責償於經徵各員遽令按
日分賠則操之過蹙徒啟挪新掩舊之弊况民
間知積欠不完官爲代賠則刁抗之徒轉得置
身事外將來掛欠更多實於催科大有關係竊
以清完庫款必先寬恤民力勒追舊欠更宜杜

絕新虧臣與司道通盤籌商所有元二三四等
年墊完漕尾除現已完解還款外其餘實欠在
民之數可否仰懇

皇上天恩俯准從上年奉

旨之日起限按照欠數勻作三年帶徵提解歸款庶
小民稍緩追呼而

帑項仍歸有著如蒙

俞允容

臣

飭行司道查造完欠細冊分限嚴提如再

逾限不完卽將前後接卸各員嚴叅懲辦其動
墊銀款著落原墊及接徵之員按日分賠仍令

後任嚴追解司爲彌補無著之用倘刁民藉詞
抗欠卽行懲治其自道光五年起墊完漕尾應
請仍照前撫臣張師誠原奏勒限一年徵完若
於一年限內遇有州縣交代不得再抵存庫正
項倘有逾限不完亦照舊欠分別著賠如敢於
逾限後尙稱墊欠未完希冀輾轉搪抵卽以實
虧嚴叅治罪江藩司所屬亦請畫一辦理如此
則民氣旣藉以稍紓府庫亦歸於實補免致以
舊墊釀爲新虧於

帑項較有裨益所有江蘇省民欠漕尾請展限徵

補緣由謹會同兩江總督臣琦善合詞恭摺具奏伏乞

皇上聖鑒訓示遵行謹

奏

道光六年三月二十一日具

奏四月二十日奉到

硃批另有旨欽此同日奉到六年四月初六日內閣奉

上諭陶澍奏舊欠漕尾催追尙未徵足懇予展限一摺江蘇省各屬墊完民欠漕尾抵作庫項移交後

任接徵歸補前經降旨勒限一年責成現任之員
追完逾限嚴叅懲辦動墊銀款按日分賠茲據該
撫奏稱三年分全省被災之後民間元氣未復災
緩帶徵各款輸將已屬竭蹶再加漕尾同時並徵
民力實有未逮將次一年限滿據報徵完之數不
過十之三四若遽令經徵各員按日分賠轉啟挪
移之弊加恩著照所請江蘇省道光元二三四等
年墊完漕尾除已完解歸款外其餘實欠在民之
數准自五年奉旨之日起限按照欠數勻作三年
帶徵提解歸款如再逾限不完卽將前後接卸各

員嚴叅懲辦其動墊銀款著落原墊及接徵之員按日分賠仍令後任嚴追解司爲彌補無著之用刁民藉詞抗欠卽行懲治其自道光五年起墊完漕尾勒限一年徵完遇有州縣交代不得再抵存庫正項逾限不完照舊欠分別著賠若於逾限後捏稱墊欠未完希冀輾轉搪抵著卽以實虧嚴叅治罪該部知道欽此

請將積年緩帶漕米留備民食摺子

總督會稿
附片一件

奏爲蘇省徵存積年緩帶漕米擬留本省糶濟民

食請

旨遵行事竊照蘇松常鎮太四府一州五年分新漕
全歸海運尙有帶徵三年初二限及歷年災緩
米石前因新舊並納民力拮据仰蒙

皇上天恩將長洲等州縣帶徵二限米石遞緩一年
催徵其餘各年緩帶之米有早已徵存在倉及
陸續徵收者伏查倉儲原應陳陳相因前奉

諭旨毋庸折色變價是以臣等於議覆海運章程摺

內聲請將緩帶米石隨同新漕一併搭運赴津
在案惟查本年起運全漕米數本多此項緩帶
米石間有徵存在倉已歷歲時者江南梅雨易
蒸積久漸黯未能一律乾潔兼查蘇屬漕額甲
於各省向來民間除納糧外本境之米每不敷
本境之食全賴客米接濟本年上游江廣各省
來米無多兼因剝運同時雇船甚衆米販益稀
而本境自三年水災之後倉儲動缺民鮮蓋藏
上年秋稼適又爲風霧所傷米質未能飽綻目
下全漕起運民間存米無多現當青黃不接之

際糧價漸增並恐此後尙有騰貴據司道查明情形詳請核辦前來臣等仰體

皇上軫卹民艱慎重地方之至意不能不先事圖維因思前項緩帶米石據各州縣具報徵存在倉計有十五萬餘石現在陸續接徵均係應行搭運之款而本年蘇松等屬除起運全漕一百五十餘萬石外尙有節省耗米四五萬石經臣等奏明作正交倉現又接奉

諭旨發帑收買沙船耗米以卹商情計亦不下十萬石內外是全漕正額之外儘有贏餘而蘇省民

食正值艱貴之時若將前項帶徵緩漕米石留
備本省糶買卽以蘇省糶出之項抵補天津收
買沙船耗米之價一轉移間於

太倉無損毫末而民食得以充裕裨益良非淺鮮
合無仰懇

天恩俯准將蘇省海運應行搭解緩漕米石乘此青
黃不接之時按照時價出糶以資民食如蒙

俞允臣等卽飭藩司將糶易銀兩刻期提解司庫報
撥不許絲毫存留屬庫至米質存倉間有經歷
霉天未能一律倘糶不足數應卽責成收貯之

員照價賠補以符定例所有蘇省徵存緩漕請
留備糴濟民食緣由謹會同總漕臣陳中孚合
詞具

奏伏乞

皇上訓示遵行謹

奏

道光六年四月初四日具

奏五月初四日奉到

硃批另有旨欽此同日奉到道光六年四月十九日

內閣奉

上諭琦善等奏請將積年緩帶漕米留備民食一摺
江蘇省各年緩帶米石前經該督等奏請隨同新
漕一併搭運惟該省本年起運全漕米數甚多民
間蓋藏未裕現值青黃不接之際自應量加調劑
以恤民艱著加恩將該省海運應行搭解緩漕米
石卽飭藩司按照時價出糶俾民食有資所糶銀
兩刻期提解司庫報撥如存米未能一律糶不足
數卽責成收貯之員照價賠補該部知道欽此

再蘇省海運漕白糧米有天津通倉兩處應用經費前已由蘇籌解銀十二萬餘兩嗣准戶部疊次咨行天津剝價等款除解過外尙多不敷復經臣等

奏請酌動節省漕項銀七萬兩同部撥隨漕費腳銀三萬兩一併委員解津奉

硃批戶部知道欽此欽遵在案茲據藩司賀長齡詳稱接准清河道陶樑天津道鄭祖琛咨稱天津需用緯夫露囤等款較原奏約尙不敷銀二萬餘兩應由江蘇補解等語由司請撥漕項前來

臣等查海運事屬創行一切隨時用款均無成例可循是以蘇省兩次籌撥之項均係約略核計解往應用現在原議銀數既有不敷則此後有無續增仍難預定應請

旨於蘇糧道庫節省漕項內再行酌動銀五萬兩解往天津以濟急需俟全漕完竣按照前後解過銀數查明在通倉支用者卽由倉場核銷在天津支用者卽由直隸省核銷庶款目不致糾纏而待支亦無延誤除飭委員趕解外所有臣等籌款續解緣由謹會同漕臣陳中孚合詞附片

具

奏伏乞

聖鑒謹

奏

道光六年四月初四日附

奏五月初四日奉到

硃批另有旨欽此同日奉到道光六年四月十九日

內閣奉

上諭琦善等奏海運漕糧到天津用項不敷請籌款
續解等語本年辦理海運事屬創始一切用款均

無成例可循前經該督等兩次籌款解往天津尙不敷絳夫露囤等款銀二萬餘兩此外恐仍有續增之項自應酌量籌撥著照所請准其在蘇糧道庫節省漕項內再行動撥銀五萬兩迅卽委員解往天津以資應用俟全漕完竣後按照前後解過銀數查明在通倉支用者由倉場衙門覈銷在天津支用者由直隸省覈銷該部知道欽此